

PROTOCOL da la radunanza generala dals **17-06-2017**

Sala polivalenta, La Punt Chamues-ch, 10:30

Tractandas	
1.	Bainvegni
2.	Salids da a) Hans Barandun, vicepresidente da La Punt Chamues-ch b) Barbara Janom Steiner, presidenta da la regenza grischuna
3.	Fatschentas statutaras
	3.1 Elecziun dals dumbravuschs
	3.2 Protocol da la radunanza generala dals 21 da matg 2016 a Cuirra
	3.3 Rapport annual, quint e bilantscha 2016 da la SRG.R; rapport dal revisurat; distgargia da la suprastanza
4.	Activitads da la societad
5.	Ladina Heimgartner, directura RTR: sguard enavos – sguard enavant
6.	Surdada dal Premi SRG.R 2017 al comité d'organisaziun dals Dis da litteratura. Laudatio: Iso Camartin
7.	Varia

1. Bainvegni

Il president, Oscar Knapp fa in cordial bainvegni a las commembras ed als commembers da la societad purtadra SRG.R ed engrazia a las autoritads da La Punt Chamues-ch per l'ospitalitad. Salids speziels van a la presidenta da la regenza grischuna, dunna Barbara Janom Steiner ed al vicepresident da La Punt Chamues-ch, signur Hans Barandun. Els portan ils salids da la regenza e da la vischnanca da La Punt. Plinavant salida il president il cusseglier naziunal engiadinais Duri Campell, Andreas Schefer, il president da la SRG Svizra Tudestga, Beat Schneider, secretari central da l'SRG SSR ch'è er commember da la SRG.R ed emprenda gist rumantsch vallader. In cordial salid va era a Laura Decurtins, Sara Herrmann e Natalia Tuor. Ellas represchentan il comité d'organisaziun dals Dis da litteratura, che vegn undrà cun il Premi SRG.R 2017. Er Benedetto Vigne, in dals fundaturs dals Dis da litteratura è preschent a la radunanza. La laudatio tegn professor Iso Camartin. Last but not least va in bainvegni er a la directura da RTR, Ladina Heimgartner ed als commembers da la direcziun. Per la Lia Rumantscha è Andreas Gabriel da la partida. Sa perstgisads per la radunanza èn tranter auter: il directur general Roger de Weck, il nov directur general Gilles Marchand che surpiglia quest post a partir dal october, il president da la SRG Jean Michel Cina, il secretari general partent da la Lia Rumantscha Urs Cadruvi, ses successur Martin Gabriel ed il president Johannes Flury.

Il president surdat il pled per il bainvegni a signur Hans Barandun e suenter a dunna Barbara Janom Steiner.

2. Salids da...

Hans Barandun, vicepresident da La Punt Chamues-ch preschenta il cumün da La Punt Chamues-ch che tutga oz tar la regiun Maloja e declera in zic l'istorgia dal vitg. Ils projects actuals da la Punt èn il sviament dal traffic e la renaturalisaziun dal flum En. Da quest project empermetta la vischnanca in nov carisma che pudess resplender er sur ils cunfins dal Grischun. Hans Barandun declera er la situaziun dal rumantsch da La Punt, dals idioms e dialects dal Grischun. El fa in compliment ad RTR e di che quels fetschian fitg bain lur job. El serra ses pled cun in citat en tut ils idioms: cur che las tgirallas sgolan enturn èsi er en l'Engiadin'Ota primavaira.

Il president engrazia a signur Hans Barandun per quest pled da bainvegni e surdat il pled a la presidenta da la regenza Barbara Janom Steiner.

Barbara Janom Steiner (BJS) porta il megliers giavischs da la regenza. "Nüglia resta sco chi d'eira". Cun quests plects fa BJS avis sin la situaziun en Gronda Bretagna, en ils Stadis Unids e la crisa da l'Uniun europeica. Er la Rumantschia saja en midada. Ella menziunescha la crisa da la gasetta La Quotidiana e fa la punt sin Radio Televisiun Rumantscha che vegn confruntà cun in'iniziativa che midass tut: la No Billag. BJS declera che quest'iniziativa mussia in patratgar a curta vista che glorifitgeschia il passà e quai saja fauss. La sfida actuala saja da prender cun in'expressiun positiva ed orientada al futur. Erich Fried, in liricher austriac aveva ditg ina giada: tgi che vul ch'il

mund restia sco quai ch'el è na vul betg ch'el restia. Las midadas che vegnan sajan er ina schanza. I saja da dar a noss temp la tempra da nossa generaziun. Barbara Janom Steiner finescha cun la remartga ch'ella ed er la regenza grischuna sajan pronts da confruntar las sfidas ed ils midaments da quest temp en in senn positiv e constructiv per in futur segirà da RTR e da la Rumantschia. Il sustegn da la regenza Grischuna saja segirà.

Cun applaus engrazia la raspada a la presidenta da la regenza, Barbara Janom Steiner. OK engrazia er da sia vart e preschenta curt la suprastanza avant che ir tar las tractandas statutaras.

3. Fatschentas statutaras

Nagin na dumonda il pled pertutgond las tractandas, uschia che quellas valan sco acceptadas.

3.1 Elecziun dals dumbravuschs

Il president propona Andreas Gabriel e Seraina Bickel sco dumbravuschs ed engrazia ch'els èn pronts da surpigliar quest'incumbensa. La radunanza approvescha la proposta cun acclamaziun.

3.2 Protocol da la radunanza generala dals 21 da matg 2016 a Cuira

Il president avra la discussiun davart il protocol da la radunanza generala dals 21-05-2016 a Cuira. Nagin na giavischa il pled. Il protocol vegn approvà unanimamain. OK engrazia ad Anna Maria Ratti per la formulaziun dal protocol.

3.3 Rapport annual, quint e bilantscha 2016 da la SRG.R; rapport dal revisurat; distgargia da la suprastanza

a) Rapport annual 2016

Il president fa attent sin divers puncts dal rapport annual. Ord motivs da buna governanza saja quel, gia per la segunda giada, separà dal rapport da RTR. OK fa er attent sin la pagina 24 e beneventa la nova manadra dal post SRG.R a Cuira, dunna Sandra Carisch-Killias. Ils rapports dal service public e da qualidad da RTR han ils commembers survegnì ensemen cun l'invit. Quests rapports chattan ins er en la rait sin www.rtr.ch.

b) Quint e bilantscha 2016 da la SRG.R; rapport dal revisurat; distgargia da la suprastanza

Il quint e la bilantscha èn integrads en il rapport annual sin pagina 15 e 16. OK declera che la SRG.R haja survegnì il 2016 dapli daners da Berna, tranter auter perquai ch'ins haja stuì separar ils secretariats da RTR ed SRG.R. El engrazia ad Andreas Schefer ed a Beat Schneider ch'els hajan sustegnì quest augment da radund

60'000 francs. Il quint serra cun in pitschen minus da 179 francs. En la bilantscha ves'ins che la facultad da la societad resta pli u main tuttina cun ina summa da bun 200'000 francs.

Cunquai ch'omadus revisurs da quint n'èn betg preschents vala lur rapport a scrit nua ch'els recumondan d'approvar il quint.

Il president avra la discussiun sur dal quint e la bilantscha 2016. Nagin na dumonda il pled. La radunanza approvescha il quint e la bilantscha senza cuntravuschs e dat distgargia a la suprastanza.

4. Activitads da la societad

4.1 Il president menziuna las elecziuns sin champ naziunal: Jean Michel Cina ha cumenzà l'emprim da matg 2017 sco nov president da la SRG SSR. A partir da l'emprim d'october 2017 remplazza Gilles Marchand il directur general Roger de Weck. OK fa er attent a las elecziuns da la davosa radunanza generala per la perioda 2017 enfin 2020. Nov en suprastanza è Gion Lechmann. Il 2018 sto OK sa retrair or da motivs statutarics, uschia ch'i dat in'elecziun presidenziala l'onn proxim (per la perioda 2019-2020).

4.2

Ils contacts cun la politica hajan mussà che RTR haja grond sustegn sin plaun politic. I dettia dentant critica pertutgond la SRG SSR en general. La SRG.R ed RTR na possian betg pli quintar automaticamain cun la solidaritad en Svizra e stoppian perquai far dapli sforzs per declerar tge che RTR e la SRG.R fetschian e pertge che quai saja impurtant.

4.3

OK preschenta la situaziun actuala a regard la discussiun "service public" e "No Billag" ed explitgescha las consequenzas che l'iniziativa pudess avair. Er ina cuntraproposta avess consequenzas fatalas per RTR. Perquai saja inevitabel da sa preparar bain sin questa votaziun. La SRG.R veglia tranter auter far quai cun in lavuratori.

5. Ladina Heimgartner, directura RTR: sguard enavos – enavant

Ladina Heimgartner, directura RTR, preschenta il program da RTR e di ch'i haja dà ina restructuraziun da la direcziun. Da nov fetschia Tamara Deflorin (scheffa comunicaziun) er part da la direcziun e quai saja impurtant. Gian Ramming (schefredactor) surpiglia proximamain ina partiziun cun il num svilup.

Cifras: RTR saja anc adina il numer 1 tar las rumantschas ed ils rumantschs. En l'entira Svizra taidlan en media 79'000 persunas RR almain ina minuta a di. Questa cifra saja s'augmentada enorm perquai ch'i vegn da nov mesirà en l'entira Svizra quants che taidlan RR. Var 30'000 guardan Telesguard di per di. Er la purschida dad internet chattia bun sustegn cun bun 30'000 unic clients al mais. Questa cifra haja fatg in grond sigl ils ultims onns.

LH preschenta ils eveniments impurtants ed ils accents dal program da RTR dal onn passà e dat in sguard en l'onn che vegn. La preschentaziun da la directura è da chattar sin la pagina d'internet www.srgr.ch.

Il president engrazia a Ladina Heimgartner per las explicaziuns.

OK engrazia er a tut ils collavurators ed a tut las collavuraturas da RTR per lur engaschi.

6. Surdada dal Premi SRG.R 2017 al comité d'organisaziun dals Dis da litteratura a Domat. Laudatur: Iso Camartin

Bibi Vaplan avra questa surdada cun la chanzun: Lascha mai.

OK engrazia per questa introducziun e preschenta curt professor Iso Camartin che fa la laudatio.

En ses pled punctuescha prof. dr. Iso Camartin che la litteratura saja en sasez ina chaussa intima per quels che scrivan e per quels che legian. Litteratura stoppia dentant – sco tut ils auters arts era – bandunar mintgatant l'intimitad e daventar publica. Uschia possian ins far surstar betg mo lecturas e lecturs passionads, mabain l'entira societad. U almain la part alerta da quella. Quai fetschian ils Dis da litteratura a Domat per la societad rumantscha, ha Camartin punctuà. Per quellas e quels che hajan gugent poesias e romans e novas furmas d'inventar patratgs e sentiments cun plets e cun musica, cun clerezza en il cor e cun rebelliun en il tscharvè, saja mintga november a Domat sco Nadal e Pasca ensemen. E festas stoppian ins festegiar cura ch'ellas crodian, ha ditg Iso Camartin.

Laura Decurtins prenda il pled ed engrazia a la SRG Svizra Rumantscha per quest'onur. Ella menziuna ch'i sajan numerusas persunas che s'engaschan onn per onn per la litteratura. Il bel vid quest premi saja ch'el onureschia in'idea e betg ina prestaziun explicita dad ina persuna. Ils dis da litteratura sajan ina visiun cuntinuanta.

Quest premi saja sco in da 6 en il lotto e perquai sajan ils 27avels Dis da litteratura "Gieus da litteratura".

Bibi Vaplan concluda questa surdada dal premi cun tuns fins bain tschernids.

7. Varia


Il president dat anc ina giada la pussaivladad a las preschentas ed als preschents da prender il pled per inqual tema. Da quai na vegn betg fatg diever, ed uschia engrazia el a commembras, commembers e giasts ch'èn vegnids a la radunanza. El engrazia plinavant a Sandra Carisch-Killias, Tamara Deflorin e Marina Morgenthaler per l'organisaziun da la radunanza generala sco era al team dad Alois Beer ch'è responsabels per la tecnica da RTR. A l'equipa da RTR engrazia il president per la lavur impressiunanta durant l'entir onn.

La proxima radunanza generala è ils 26 da matg 2018 a Landquart.

Il program cuntinuescha cun in pitschen aperitiv en sala communal, accompagnà d'in intermezzo litterar da Gianna Olinda Cadonau e Dumenic Andry. A las 13:30 vegn servì in gentar comunabel en sala polivalenta.

La radunanza generala serra a las 12:30.

Per il protocol:



Oscar Knapp
President SRG.R

Sandra Carisch-Killias
Manadra dal post SRG.R

Cuira, ils 14-08-2017